

Jonathan Vieira tabata fenomenal Diadomingo anochi

E titulo aki no ta bin di mi persona.

Ta palabranan cu a ser expresa pa **Padu Lampe**, despues di e concierto di **Jonathan Vieira** cu su amigonan, diadomingo anochi den Cas di Cultura.

Si Padu del Caribe bisa: "**Jonathan (Vieira) tabata fenomenal**", kende mi ta pa bisa cu no ta asina y kico mas mi por agrega of kita di esaki? **Ta asina mes tabata!**

Un concierto distinto di su prome dos conciertonan navideño, tocando algun di su propio composicionnan, y acompaña pa e bahista colega musico **Steve Hoevertsz** cu a resulta di ta di descendencia arubano, y e productor **Miles Kennedy** cu a toca drums e anochi aki.

Den di dos parti di e anochi, a uni cu nan, e cantante **Tim "Kico" O'Kane** cu tabata tin e parti vocal na su encargo.

Diadomingo anochi, a mira un **Jonathan Vieira** madura



musicalmente, haciendo su propio introduccionnan na un manera simpel, agradable y cu un interaccion formidable cu su publico, mezcla cu hopi humor. Pa cada cancion interpreta e tabata tin un

splicacion di e pakico e cancion aki y con el a yega na dje.

Nos a mira un **Jonathan Vieira** cu a presenta pa su publico sin ningun "**aire di artista**" y a laga su musica demostra "**e artista grandi**" cu realmente e ta riba su piano.

E parti cu a cay masha bon tabata su splicacion di su "**boots di mata cacalaca**" cu e tabata tin na pia, y e uso di bril di solo anochi, no pa tapa claridad di luz, sino pa **wanta su cabey** di cay riba su cara.

Di e cantante **Tim**, su expresion di "**kico**" na Papiamento, "**Placa**", "**Pastechi**" y "**Bon Pasco**", tabata suficiente pa el a gana curazon di e publico.

Un **Jonathan Vieira** cu a impone su propio estilo pa su interpretacionnan, di manera cu por papia di dje, mescos cu bo por papia di un toque "**Padu**", y un toque Rufo.

E anochi aki nos a scucha e toque "**Vieira**".

Manera Jonathan a habri cu e wals exitoso di dje, "**Beatriz Sonriente**" por a sinta caba cu musicalmente e anochi aki lo ta riba un nivel halto.

Un composicion sumamente bunita y cu lo por bira un clasico di nos musica tipico instrumental.

Den e cancion aki por a scucha e toquen di "**Padu Lampe**" y di "**Rufo Weber**" combina cu e "**toque Vieira**" y inconscientemente, e tabata tin den dje tambe "**toque Norman**

Moron", "**Dominico Herrera**" y e elemento clasico di e rumannan "**Palm**".

E toque "**Vieira**" cu por ser considera como un toque unico, den interpretacionnan riba piano di cancionnan tipico di e islanan aki, tabata e "**batimento sonoro**" di acordenan parti abao of parti baho di e piano, combina cu e "**Arpeggio**", e sucesion rapido di sonido di un of mas acorde.

E loradanaki aki, mirando e mannan cruza otro y dunando tononan cu tur nan claridad tabata un placer pa mira y scucha.

Den su interpretacionnan tipico, otro aspecto di "**toque Vieira**" tabata e uso di **octaafnan** yena.

Pasa notanan di octaaf cu duim y dede chiquito, y den esaki, yena e octaaf mes ora cu un of dos nota completando esaki, pa despues kibra e acorde den su variacionnan.

Un di e exitonan grandi di musica popular cu el a toca tabata interpretacion di e tango "**Uno**" combina cu parti di "**Hasta que te conocí**" di Juan Gabriel, cu e "**toque Vieira**" y cu a resulta den un beyeza di interpretacion.

Hopi aplauso el a logra tambe cu su interpretacionnan di **boleronan di antaño** y cu e publico cantando, principalmente e "**Besame mucho**", ademas e toque festivo di e prome parti aki tabata cu **Padu del Caribe**, idolo di Jonathan, cantando "**Abo so**" cu e publico acompañaando den canto.

Den di dos parti di e concierto, e "**spotlight**" tabata riba e cantante di e grupo, **Tim O'Kane** cu a gana curazon di e publico cu su cancionnan, entre otro "**Help**" y "**Hey Jude**" di The Beatles, tambe e cancion "**Honesty**" cu el a interpreta na un manera hopi sensual.

E toque special di O'Kane tabata di cambia su voz di octaaf abao y mes ora tuma un octaaf mas halto na manera fini y hopi agradable pa scucha.

El a varia cu composicionnan entre otro di Elton John, Billy Joel y Phil Collins y cu stage performance cu tabata formidable.

Na final di e anochi por a scucha solamente comentarionan positivo y di admiracion pa Jonathan Vieira, e "**descubrimiento**" di **Jan Poets**, locual a ser comenta tambe cu gratitud e anochi aki.

Bunita tambe ta di por a scucha e expectativa cu tin pa e CD di **Jonathan Vieira** cu lo no dura mucho mas pa ta riba mercado.

Jonathan a impone su number riba "**Escenario Arubano**" y esaki ta significa cu mañan cu tende cu e ta bin cu otro concierto, sigur lo no tin lugar den Cas di Cultura pa scucha e artista musico hoben y "**Grandi**" aki, di nos isla.

Un anochi so lo no ta suficiente.

Rufo Weber, Padu Lampe, Toty Arends y Victor Camacho tin un sucesor aki kende su strea pa hopi tempo lo keda briya den universo musical di Aruba.

Un danki special na "**Hermanidad di Humanidad Aruba**" cu a auspacia e anochi y manera por a tende varios comentario: "**Aruba mester di mas concierto di e indole aki di nos propio artistanan**", y Jonathan sigur a habri e porta pa esaki cu e anochi fabuloso aki. Danki Jonathan & Friends.

Juby Naar



www.diarioaruba.com

The way business moves!

DIARIO
Online
E Matutino di Aruba